

# GOBIERNO DI ARUBA TA LANSA UN PROYECTO PILOTO PA EDUCACION SIMAN AKI!

 GABINETE WEVER-CROES · TUESDAY, APRIL 9, 2019

## *Cu e proyecto aki, lo pone innovacion den educacion central*

E siman aki a habri cu un ambiente sumamente positivo cuminsando cu e bishita di e Minister di Asuntonan Interior di Reino Kajsa Ollongren kende *tawata hopi positivo y hopi impresiona con Gabinete Wever-Croes ta trahando pa asina poco poco pero sigur hiba nos pais padilanti na mes momento ganando confiansa bek.*

E siman aki, den colaboracion cu Minister di Enseñansa, Armando Lampe, Gabinete Wever-Croes ta lansa un proyecto piloto innovativo den educacion primario pa stimula e 21Century Skills for di un edad hoben caba. Gobierno lo traha cu e eLearning Pilot Project den colaboracion cu e Scol Basico Cacique Macuarima y Scol Preparatorio Atarima, na unda lo desaroya un programa di innovacion den un manera nobo y unico. E eLearning Pilot Project lo cuminsa den e aña escolar nobo.

Prome Minister Evelyn Wever-Croes a duna di conoce cu e proyecto aki a nace danki na un comision di mayor sumamente activo kendenan a haci gran parti di un sondeo pa loke e scolnan mester pa eleva e lesnan y siña e muchanan e habilidadnan nobo aki y duna e maestronan e hermentnan y recursonan cu nan tin mester pa ehecuta e cambio aki.

E comision di mayor, cu ayudo di maestronan, door di recaudacion di fondo, ya caba a logra invirti mas di 50 mil florin den e infraestructura basico di e scol cu ta necesario pa haci e proyecto aki posibel. Prome Minister ta aplaudi e iniciativa di e comision di mayor y ta gradici nan pa tur esfuerso cu nan ta haciendo.

Un inversion grandi asina di educacion, Prome Minister ta indica, no por bin solamente di comision di mayor y maestronan so. Mas ainda si ta trata di innovacion den enseñansa cu ta un prioridad pa Gabinete Wever-Croes. Den e proximo lunanan, Gobierno lo haci un inversion di mas di 250 mil florin den smartboards den tur lokaal di les y tambe den mas di 25 computer pa e sala di computer. Tambe e inversion lo cubri ‘Virtue Reality Goggles’ pa duna cierto lesnan den un forma mas interactivo y lo ofrece mas les di STEM (Science, Technology, Engineering, y Mathematics) tambe. Esaki ta den e cuadro di e maneho di educacion delinea den e Plan di Educacion Nacional cu recientemente Minister Lampe a presenta. Pa segura cu tur ekipo keda mas duradero, lo pone airco den tur lokaal di les pa

duna sostenibilidad necesario cu lo yuda tambe pa muchanan haya les den un ambiente mas comfortable den temporada di calor.

Prome Minister a enfatisa cu esaki no ta solamente un inversion den ekipo sino tambe e ekipo di innovacion di Gobierno di Aruba lo traha hunto cu e scol y cu comision di mayor, cu e ekipo di ministerio di educacion, cu stakeholders di e Plan di Educacion Nacional, entre otro Departamento di Enseñansa y Schoolbestuur. Meta ta pa pone e obhetivonan di e Plan di Educacion Nacional den accion y crea un modelo di evualacion pa cu e eLearning Pilot Project. Di e manera aki, por siña di e proyecto piloto aki y aplica esaki den otro proyectonan na otro scolnan. Cu e proyecto aki, lo pone innovacion den educacion central.

Prome Minister ta haci un apelacion na tur comision di mayor cu tin ideanan innovativo y cu ya caba a haci sondeonan pa proyectonan, pa nan comparti nan ideanan. Gobierno di Aruba sigur lo tene tur idea y recomendacion den consideracion den e proceso di implementacion di e Plan Educacion Nacional.